

Spartir la pascion per l ciantèr

L Cor Valfassa e l Cor Cat Gardeccia de San Giovanni in Persiceto à tegnù n bel concert

Mùsega - Che ài pa da spartir l Cor Valfassa e l Cor Cat Gardeccia de San Giovanni in Persiceto te la provinzia de Bologna? L'amor e la pascion per l ciantèr, chel segur! Na pascion e n talent uzé fora en sàbeda passèda en ocajon del concert che chisc doi cores da mont à tegnù te la palestra Energym de Soraga, per endrez de la Pro Loco de paisc.

I prumes à fèr aprijèr sia oujes fones l'é i stat i corisc del Cor Valfassa che de passa 40, vidé dal maester Stefano Vaia, à enterzà con gran forza cianties più cognosciudes e ligherzines, desche "La domenica andando alla messa" o "Sul ciastel de Mirabel" de Pigarelli a cheles mingol più chietes e mesties desche "Ninna Nanna" de Dionisi o "La Sposa morta" de Pedrotti per fenir sù en legreza con "Le carrozze" semper de Dionisi. L Cor Valfassa é oramai doventà n cor dassen aprijà te val e foravia per la beleza de la oujes e la capacità corala di ciantores.



Enceben che l gran publich te sala aesse domanà l bis, l Cor Valfassa ge à lascià lèrga ai corisc del Cor Cat Gardeccia, n cor de ic e de eles de zirca 30 de elemenc che à tacà ite sia ejibizion col tòch "Turdion" de n anonim franzous. L feruscol prejentador à spiegà sobito la rejons del raport che lea l cor a nesc posc da mont. "Dut l'é nasciù da 5 nesc amicis bologneisc – l'à dit – che ti egn '40 ruèa en vacanza te la Dolomites. Chiò i scutèa i conzerc di cores da mont e i li tolea jù con

chi aparac a sosta de enlouta. Canche i ruèa de return i metea sù chisc filmac ma i era muc e dachelanvia se aon pissà: perché pa endèna che ge vardon a chisc filmac no ge cianton dò noi?" L'era l 1946 che nascea apontin l Cor Cat Gardeccia che à tout l'inom proprio dal refuge Gardecia olache l'é amò fora n veie retrat smari del prum cor. La vertola per ruèr te Fascia e endrezèr chest concert ensema al Cor Valfassa l'é stat proprio i festejamenc di 60 egn del Cor de San Giovanni in Persiceto e l'ocajon bona de jir endodanef te Gardecia a fèr n auter retrat da meter al post de chel oramai smari. Apede a la cianties da mont desche la cognosciuda "Rifugio Bianco" de Bepi De Marzi, l Cor Cat Gardeccia à portà dant ence tòc de lengac foresc desche "Canso do Boye" de Bon, "Alma Allanera", e "Hava Nagila" con l'armonisazion del Cor Mangioie.

Inant de serar sù l concert i doi cores se à baratà vèlch don en segn de amicizia e de stima e i se à merità l lonch batiman del publich. (mci)



L Cor Valfassa e l Cor Cat Gardeccia à endeletà la jent te la palestra de Soraga.